

全唐诗卷三十一

卷 31_1

【五郊乐章□黄帝宫音】魏徵

黄中正位，含章居贞。
既长六律，兼和五声。
毕陈万舞，乃荐斯牲。
神其下降，永祚休平。

卷 31_2

【五郊乐章□肃和】魏徵

眇眇方輿，苍苍圆盖。
至哉枢纽，宅中图大。
气调四序，风和万籁。
祚我明德，时雍道泰。

卷 31_3

【五郊乐章□雍和】魏徵

金悬夕肆，玉俎朝陈。
飧荐黄道，芬流紫宸。
乃诚乃敬，载享载禋。
崇荐斯在，惟皇是宾。



卷 31_4

【五郊乐章□舒和】魏徵

御征乘宫出郊甸，安歌率舞递将迎。
自有云门符帝赏，犹持雷鼓答天成。

卷 31_5

【五郊乐章□青帝角音】魏徵

鹤云旦起，鸟星昏集。
律候新风，阳开初蛰。
至德可飧，行潦斯挹。
锡以无疆，烝人乃粒。

卷 31_6

【五郊乐章□肃和】魏徵

玄鸟司春，苍龙登岁。
节物变柳，光风转蕙。
瑶席降神，朱弦飨帝。
诚备祝嘏，礼殫珪币。

卷 31_7

【五郊乐章□雍和】魏徵

大乐稀音，至诚简礼。
文物棣棣，声名济济。
六变有成，三登无体。
乃眷丰絜，恩覃恺悌。

卷 31_8

【五郊乐章□舒和】魏徵

笙歌簫舞属年韶，鹭鼓鳧钟展时豫。
调露初迎绮春节，承云遽践苍霄驭。

卷 31_9

【五郊乐章□赤帝徵音】魏徵

青阳告谢，朱明戒序。
咸长是祈，敬陈椒醑。
博硕斯荐，笙镛备举。
庶尽肃恭，非馨稷黍。

卷 31_10

【五郊乐章□肃和】魏徵

离位克明，火中宵见。
峰云暮起，景风晨扇。
木槿初荣，含桃可荐。
芬馥百品，铿锵三变。

卷 31_11

【五郊乐章□雍和】魏徵

昭昭丹陆，帟帟炎方。
礼陈牲币，乐备簠簠。
琼羞溢俎，玉醑浮觞。
恭惟正直，歆此馨香。

卷 31_13

【五郊乐章□舒和】魏徵

千里温风飘降羽，十枝炎景睴朱干。
陈觞荐俎歌三献，拊石攄金会七盘。

卷 31_14

【五郊乐章□白帝商音】魏徵

白藏应节，天高气清。
岁功既阜，庶类收成。
万方静谧，九土和平。
馨香是荐，受祚聪明。

卷 31_15



【五郊乐章□肃和】魏徵

金行在节，素灵居正。
气肃霜严，林凋草劲。
豺祭隼击，潦收川镜。
九谷已登，万箱流咏。

卷 31_16

【五郊乐章□雍和】魏徵

律应西成，气躔南吕。
珪币咸列，笙竽备举。
苾苾兰羞，芬芬桂醑。
式资宴飨，用调霜序。

卷 31_17

【五郊乐章□舒和】魏徵

璿仪气爽惊缇籥，玉吕灰飞含素商。
鸣鞀奏管芳羞荐，会舞安歌葆眊扬。

卷 31_18

【五郊乐章□黑帝羽音】魏徵

严冬季月，星回风厉。
享祀报功，方祚来岁。

卷 31_19

【五郊乐章□肃和】魏徵

律周玉琯，星回金度。
次极阳乌，纪穷阴兔。
火林散雪，阳泉凝沍。
八蜡已登，三农息务。

卷 31_20

【五郊乐章□雍和】魏徵

阳月斯纪，应钟在候。
载絜牲牷，爰登俎豆。
既高既远，无声无臭。
静言格思，惟神保佑。

卷 31_21

【五郊乐章□舒和】魏徵

执籥持羽初终曲，朱干玉戚始分行。
七德九功咸已畅，明灵降福具穰穰。

卷 31_22

【享太庙乐章□永和】魏徵



於穆烈祖，弘此丕基。
永言配命，子孙保之。
百神既洽，万国在兹。
是用孝享，神其格思。

卷 31_23

【享太庙乐章□肃和】魏徵

大哉至德，允兹明圣。
格于上下，聿遵诚敬。
嘉乐斯登，鸣球以咏。
神其降止，式隆景命。

卷 31_24

【享太庙乐章□雍和】魏徵

崇兹享祀，诚敬兼至。
乐以感灵，礼以昭事。
粢盛咸絜，牲牷孔备。
永言孝思，庶几不匮。

卷 31_25

【享太庙乐章□长发舞】魏徵

濬哲惟唐，长发其祥。
帝命斯祐，王业克昌。
配天载德，就日重光。
本枝百代，申锡无疆。



卷 31_26

【享太庙乐章□大基舞】魏徵

猗与祖业，皇矣帝先。
剪商德厚，封唐庆延。
在姬犹稷，方晋逾宣。
基我鼎运，于斯万年。

卷 31_27

【享太庙乐章□大成舞】魏徵

周穆王季，晋美帝文。
明明盛德，穆穆齐芬。
藏用四履，屈道参分。
铿锵钟石，载纪鸿勋。

卷 31_28

【享太庙乐章□大明舞】魏徵

五纪更运，三正递升。
勋华既没，禹汤勃兴。

神武命代，灵眷是膺。
望云彰德，察纬告征。
上纽天维，下安地轴。
征师涿野，万国咸服。
偃伯灵台，九官允穆。
殊域委赉，怀生介福。
大礼既饰，大乐已和。
黑章扰圉，赤字浮河。
功宣载籍，德被咏歌。
克昌厥后，百禄是荷。

卷 31_29

【享太庙乐章□寿和】魏徵

八音斯奏，三献毕陈。
宝祚惟永，晖光日新。

卷 31_30

【享太庙乐章□舒和】魏徵

圣敬通神光七庙，灵心荐祚和万方。
严禋克配鸿基远，明德惟馨凤历昌。

卷 31_31

【享太庙乐章□雍和】魏徵

於穆清庙，聿修严祀。
四县载陈，三献斯止。
笾豆撤荐，人祗介祉。
神惟格思，锡祚不已。



卷 31_32

【享太庙乐章□永和】魏徵

肃肃清祀，烝烝孝思。
荐享昭备，虔恭在兹。
雍歌撤俎，祝嘏陈辞。
用光武志，永固鸿基。

卷 31_33

【赋西汉】魏徵

受降临轺道，争长趣鸿门。
驱传渭桥上，观兵细柳屯。
夜宴经柏谷，朝游出杜原。
终藉叔孙礼，方知皇帝尊。

卷 31_34

【暮秋言怀】魏徵

首夏别京辅，杪秋滞三河。
沉沉蓬莱阁，日夕乡思多。
霜剪凉阶蕙，风捎幽渚荷。
岁芳坐沦歇，感此式微歌。

卷 31_35

【述怀（出关）】魏徵

中原初逐鹿，投笔事戎轩。
纵横计不就，慷慨志犹存。
杖策谒天子，驱马出关门。
请缨系南粤，凭轼下东藩。
郁纆陟高岫，出没望平原。
木鸣寒鸟，空山啼夜猿。
既伤千里目，还惊九折魂。
岂不惮艰险，深怀国土恩。
季布无二诺，侯嬴重一言。
人生感意气，功名谁复论。

卷 31_36

【奉和正日临朝应诏】魏徵

百灵侍轩后，万国会涂山。
岂如今睿哲，迈古独光前。
声教溢四海，朝宗引百川。
锵洋鸣玉珮，灼烁耀金蝉。
淑景辉雕辇，高旌扬翠烟。
庭实超王会，广乐盛钧天。
既欣东日户，复咏南风篇。
愿奉光华庆，从斯亿万年。

